

## Kaimė pri mėška

Adīnas lek, dėina jau senk,  
Cīrolė i lėzdus, kiaušėnems apkluotė, plunksnas velk.  
Mėgla ristiuom džiausta droboliu galībės,  
Vuo biški švakesnės sometė i prūda, ka nesimatītom skīlės.

Naktelė so basanuoškiem atejė par dėrva,  
Paskiau per mėžiūs juojė ont stėrnā.  
Aplinkou vėsė somėga , tik suodgalie šonātis nelend i būda,  
Vampazėj i vampazėj pri toštė jiedalu bliūda.

Kažkėinuo longė kuzāva degonti žvakė,  
O koisė, i švėisa suliekėi, zvėmbė kāp patrakė.  
Kažkuoks apkoitės vabals vuožies i longa,  
Ė nokrėtės pamatė be pruota žvaigždieta dongo.

Ožrūgusiuoms akims mienulis ožsėkuorė ont stuoga be druobīnu,  
Tuoks dėdėlis, baisė poikos, spalva kāp apelsina,  
Paskiau ėšsėpūtės kāp erkė kėla aukštīn i dongo,  
Ėr ont debesė ėšsėdriebės viepsa i vėsū longus.

Vėsos kaims kap ėšmėrės i sapnus panėra.  
Kažkėinuo sapnė – žali jūra, kažkam kvietkuom snėga ,  
O ta zbrainiuoji naktelė pati i sapna nolašiejė  
Ė pasėriemusi i tvuora da knarktė pradiejė.

Ėr tik gaidiou paleidos kakarėnė i darba,  
Naktelė noboda ėr išsėjuovėjė tėisė par darža.  
Mienulis, edams goltė, pamėskie kuojės nosėplautė skobiejė,  
Bet gegolė ožkokavos, pas mėška laumės arbatas noplustiejė.

Žmuonės kāp skrozdės sokėla, i darbus ėnėka,  
Kiaulės žvėig, karvės baub, katėnā lauk pėina pri turielkā,  
Bėld viedralė, tarkas kap lėktovā kauk,  
Kažkas garse vuomau – „tievā, ožjiestė mauk.

Kuokiū kvapū pasklėda po vėsa kaima, net dvasė trauk –  
Blīnu, kiaušėnīnės, vuo kažkor svėliesiu debeselė pru longa plauk.  
Labiausė nuosi katola kepamū lašėniū smuoks,  
Gali pamėslītė ka ožsėveisė rastuorans kažkuoks.

Tėp ė sojoda pri mėška kaimalis,  
Varlės šėlduos ont prūda lėptalė,  
Kažkas ėš naktėniu mėkoilu tebmėigt pu agrastū kero,  
Mosės kāp biasā, sojies anou kuo gėra.

Tep laiks spierė ėr ėn, atruoda ka viedrās kažkas anou sem,  
Ruoduos, nieks nesėkeit ,tik jiegas kažkuokėj nematuomė vagis atēm.  
Net karšta dėina, plaukūs šerkšnos ėštėrptė nebnuor,  
Kāp gailo, ka tuos senatvės kāp bliuskas – nenosėmausi ė nenosvėisi bikor.